

天岳山館文鈔

天岳山館文鈔卷十一

吳文節公別傳

公諱文鎔字甄甫號雲巢儀徵人少能文爲吳穀人祭酒所賞拔嘉慶二十四年進士選庶吉士授編修道光二年充山西副考官八年典試湖北尋督河南學政十二年分校順天鄉試明年分校會試遷贊善大考遷侍講累遷侍講學士十四年督學順天以選拔屆期疏請通飭嚴禁招搖革卷費冊費諸名目所得皆知名士累擢詹事內閣學士除禮部侍郎署經筵講官典武會試十八年充會試副考官調刑部奉

命偕蕭山湯文端案事浙江江南安徽諸行省覆奏皆稱

旨十九年授福建巡撫偕署總督魏公元烺奏籌海口查禁鴉片章程四則下部議行明年署閩浙總督時英吉利夷船駛入內洋詔遣祁侍郎囑藻黃侍郎爵滋會同公及鄧督部廷楨籌備海防及揀選水師將領各事宜先是公與鄧公會奏請給海防經費至是得

旨渝行故事琉球國間歲一貢自十九年詔改每四年遣使朝貢是歲中山國王尙育咨稱琉球地濱海最患多風惟朝貢以時則風雨和順每遇貢年歲必大熟又貢舶出入閩疆歲頒時憲書得以因時趨事庶務合宜又琉球不產藥材賴貢舶載回應用至航海鍼法全賴隨時學習番休更替若四年一朝則豐歉不齊人

時莫授藥品缺乏鍼盤荒疏請奏復舊制公疏聞

手敕報曰據奏情辭真摯如所請行並

允令陪臣子弟四人隨同貢使入監讀書公尋調湖北巡撫未赴
二十一年正月以英人反覆肆擾疏請添撥海防經費又密陳廈
門情形略言商民紛傳廣東有許與廈門通市之說查廈門周圍
環海地方五十里北達會垣東爲臺澎脣齒西爲漳泉門戶係通
省咽喉若令外夷闖入必益肆其占據之謀防之則已無險可守
聽之則將爲所欲爲害有不可勝言者

上韪其言又以上年英夷駛擾廈門經官軍擊退保薦總兵竇振
彪吳建勛等在事出力皆報聞五月入覲調江西巡撫汲汲以

誠民弊吏爲心遇災祲畢力撫恤凡疏請緩征者七借給籽糧者再民甚德之又以文信國公學術文章節義足爲萬世法疏請從祀文廟

詔如其議又遷 旨奏保知府倪長耀麟桂吳式芬知州周玉衡同知程燦策知縣曹士桂等前後弋獲青蓮教匪戴理劍古魁連及南贛會匪謝詞封等九十三人皆論如律在江西八年百廢具舉有

嘗調浙江浙中吏治久窳公訪悉衢州游擊薛思齊貪劣狀劾成新疆又劾罷縣令五人下教各屬地方大利害許條上施行舊鑑不飭者罪無赦又時時巡行閭巷問民疾苦察長吏賢否千里外

纖悉周知士豪猾胥皆歛迹屬吏莫敢詭隨風尙一變又以浙屬
牧令多署事者疏陳調署之弊謂有遞署他缺二三處久不回本
任者有卸印後不回本缺閒住省垣者至交代之案愈壅愈多莫
能算結且官無定所卽政難考成見飭司分別勒回本任或不堪
同任者卽令揭參其實係虛缺或要地需才亦止許專員署理不
得紛紛更調以專責成得

旨嘉勉漁山島者浙東濱海地盜窟也公牒總督會師勦捕獲積
盜百餘人竇諸法沈燬賊船並將巢穴門戶堵除行旅大安尋偕
欽差侍郎季公芝冒清查兩浙鹽務奏籌變通章程七則從之
道光己酉杭嘉湖嚴紹五郡大水漂沒田廬無算公自以奉職無

狀致召天災上疏自効并力請行賑卹蠲豁招商平糴勸輸諸政
親赴嘉湖等屬察賑全活甚眾江公忠源時擢秀水令公委以賑
災捕盜事並畱辦海塘工江以憂歸縣人贈之卻弗受公歎曰賢
如江令可令其貧無以歸歸無以葬耶遂支養廉銀五百兩畀之
且令勿辭明年正月

文宗登極下 詔求賢公奏保藩司汪本銓臬司黃宗漢知府余
士棟同知畢承昭知縣段光清楊裕深等江公忠源亦以賑務出
力特疏薦均得 旨錄用五月西防廳北岸海決公聞報卽往勘
時風雨暴至公立泥淖中失足落水幾危以救免隨以先事失防
自請治罪部議奪職畱任八月塘工竣 詔予開復復查明各用

災歉情形分別蠲緩並給口糧許之十一月擢雲貴總督咸豐元年正月入覲

召對十二次 賜紫禁城騎馬四月抵任甄劾不職知縣四人雲南有淫祠曰華光寺俗稱某天子廟凡數十處土人奉之唯謹事涉不經公毀其廬戶其木偶於市淫祀遂革初永昌邊外夷匪乘虛入邊焚掠經官軍堵勦至是迭殲匪犯七百餘名俘獲五十餘名餘匪竄雪山以外事平而廣西賊洪秀全等復稔亂地與黔滇接烽火相聞回匪亦乘間蠢動公徵兵選將繕守備扼形勢終公任境內晏然胡公林翼時方守黎平公才之使練兵除土寇得便宜行事保擢監司待之以國士三年以捐備餉金萬寶花翎居

無何粵賊自長沙渡洞庭陷武昌蹂江西據江寧爲窟穴中原震動上知公威望移公總督兩湖至則賊自下游上犯田鎮水陸營皆失利省會戒嚴城晝閉居民一夕數驚巡撫某思移營城外爲自脫計與僚屬密議公知之立策馬至巡撫署約與死守巡撫不可公憤甚拔佩刀置案上曰城存與存城亡與亡自司道以下敢言出城者齒吾刃巡撫默然議乃定會賊已逼城公卽登保安門城樓激厲將士誓死守衣不解帶者數旬圍解巡撫慮公不相容謀先發制之疏劾公閉城坐守狀有

詔趣公進復黃州而以城守責巡撫當是時公方調胡文忠帥黔滇七百人來楚會勦而會文正國藩公典會試所得士也時在衡

陽治水軍公馳書約夾攻黃州文正許之擬俟曾胡二軍至大舉
滅賊而巡撫屢訖之趣戰益急公嘆曰吾年逾六十受國恩厚
豈猶惜死邪所以遲進者以麾下將卒宜選練且俟黔勇及水軍
夾擊耳今若此不及待矣遂以咸豐三年臘月下旬自帥七千人
進薄黃州壁堵城會大雪公日行泥潦間拊循士卒而巡撫銜公
甚遇事陰掣其肘軍械輜糧不時至已而賊來犯營公督將弁力
戰都司劉富成手刃數賊兵勇繼之殪賊數十後兩次來犯均擊
退未幾賊大至正決戰閒忽後營火起眾驚潰公下馬於雪泥中
北向叩首痛哭大呼曰無以仰對

聖朝遂自投塘水死之時四年正月十五日也年六十有三事聞

上悼憫下所司議卹 賜祭葬 予謚文節入祀昭忠祠是年六月武昌復陷巡撫先已受代去九月曾文正復武昌疏陳公死事情形并追論同官傾陷狀而公之孤忠愈白矣賊之自粵竄楚也公在滇聞報方食投箸嘆曰虎兕出柙矣竟夕欷歔不能寐及拜楚督之

命置二子一妾於蜀倍道疾馳誓滅此朝食使得如公議待曾胡二軍戮力並進不過兩閱月耳爲同官所蠻卒齎志以終悲夫公臨行復遺書曾文正曰天下大局繫于一軍宜加意訓練勿造次且勿遽以援鄂爲念公之屢懷大局而不以已與若此其視死直如歸耳彼讒公者果何爲哉公性方嚴遇事能持正鬚眉凜然聲

屬憚其丰采與林文忠並負天下望論者謂公正直林公聰明林公聰明而能正直公正直而復聰明是可以得其概矣初公撫浙時例得鹽課羨餘銀八千兩卻之及殉難家無餘貲商人感公清德欲以此爲賄公子養原曰若義也先公早受之矣先公卻而某受之是隳先公之德也敢辭強之卒不受養原以已未副貢授主事襲騎都尉

贊曰曾文正克武昌後躬赴堵城設壇祭公哭以文甚哀元度時從行求觀公所自沈處未嘗不悲憤填膺也烏虜逆餞方揚生民之禍未極重以同舟相齎驅不教之卒以搗堅城欲亡死得乎同時唐提刑樹義亦以掣肘故後公一月投江死悲夫

呂文節公別傳

呂公賢基字鶴田旌德人贈公某邃於經學拔貢官敎諭公生有至性飭儉紀秉正嫉邪惡言不入於耳道光十五年進士選庶吉士授編修十七年分校順天鄉試二十二年授御史疏言南河工料與其購於他處不如取給於葦蕩請飭所司董勸庶險工有特而經費亦可省又請申禁各直省加派勒捐之弊俱從之遷給事中疏劾知州鄂雲貴緣投入揚威將軍奕經幕誑謫欺朦濫支軍餉又廣東劣幕余廷槐盤踞多年驥貨受賄與訓導黃培芳表裏爲奸藉勸練乾沒軍餉且招募匪徒充數藐法滋事請飭嚴察究治如所請行二十三年轉掌印給事中丁父憂二十六年起補禮

科給事中明年掌吏科印以河南旱災方籌辦振恤疏請將江南捐輸米轉撥豫省振災允之于八年巡視東城時江西安徽湖北水災

詔發帑振恤公疏言辦振之弊在造冊稽延定例水旱成災督撫疏報卽先給饑民一月口糧再查被災輕重分別給振誠以飢寒待哺若必待查取戶口完竣則老弱轉徙已多應請敕下所司遵照定例一面查取戶口一面放振無論極貧次貧均令先沾實惠俟冊籍已定卽於限內具題加振其加振日期務與初振接續毋許間斷至戶口或有開除續增隨時具報有任意延緩者罪之庶有司不敢貽誤而愷澤得旁流其辦振急務數則一曰多設粥廠

嚴杜尅扣攬和積弊一曰兼籌放錢糶米之法二曰展緩 恩詔
宣急宣示一曰招商採買鄰省米穀接濟一曰收恤遺棄幼孩一
曰收買耕牛疏入皆議行尋 命稽察西倉三十年正月

文宗御極公應 詔陳言一懋 聖學一正人心一育人才一恤
民隱並請將江蘇浙江等省捐米例停止未幾遷鴻臚寺卿咸豐
元年擢工部左侍郎典浙江鄉試二年兼署刑部左侍郎時刑部
主事闕尚書恆春擬照舊章以京察一等筆帖式題陞侍郎書元
欲以候補主事題補意見不同有

旨詢各堂官所見與恆春書元孰同孰異公偕尚書周祖培右侍
郎陸應穀邊

旨奏覆應如恆春議經定郡王載銓會同吏部議奏如所請公尋以粵匪河工度支漕運事事可危疏請下 詔求直言略言粵匪滋事已二年命將出師尙無成效甚至圍攻省城大肆猖獗南河豐工未合龍重運之阻滯災民之屯聚在在堪虞河工費四五百萬軍需費一千餘萬部臣束手無措必致培克脰削邦本愈搖臣愚以爲今日事勢譬之於病元氣血脈枯竭已甚而外邪又熾若再諱疾忌醫愈難爲救惟有開通喉舌廣覓良方庶可補救於萬一應請 特旨令大小臣工悉去忌諱一改泄沓之故習於時政闕失有可補救者各抒所見盡言無隱以期集思廣益疏入得旨申諭各部院大臣九卿科道有言事之責者於政治得失民生

利病有可補救者各據所見直言無隱八月充順天鄉試副考官九月署工部錢法堂事務充覆試閱卷大臣三年正月以粵匪稔亂

特命赴安徽會辦團練防勦事宜公奏請飭部撥帑備用並請帶員前往幫辦又奏所過地方如查有堪備敎習團練之人請咨各疆吏遣赴安徽軍營以資差委均如所請行二月奏請飭給事中袁甲三廣東知府趙畊均赴安徽協理防勦允之尋偕署撫周公天爵奏言團練防勦三事當分寄其任併致其力以圖之團練之事各就地方飭屬加意辦理激勸紳民殲除土匪防堵之事於江北沿江一帶擇精幹牧令稍假威權令其練本邑之兵團本

鄉之勇因本地之糧以守本境之土各固藩籬永免徵調查其辦理之善者升銜加俸不遷其職俾得盡心固守勦賊之事專責之統兵大帥如大帥駐營去賊百餘里者立卽逮問如此則各有責成無所庸其推諉疏入得

旨嘉納時湖北敗匪由英山犯太湖分黨竄出洪家埠奪船意圖東下旋竄踞安慶經官兵截勦復分黨由清涼庵至十里館犯集賢關各路兵勇接戰失利遊擊費音太伍登庸死之未幾由集賢關犯桐城邑紳馬三俊等率勇迎敵敗潰桐城陷公方駐舒城誓死守或勸曰公無守土責又未嘗一兵今賊鋒銳甚請退守以圖再舉公叱之曰吾奉

天子命治鄉兵殺賊事不濟命也退將安之遂納鞬刀率父老登
陴力禦未幾城陷公力竭死之僚屬及幕佐皆殉焉十一月巡撫

江公忠源疏聞

諭稱公品學兼優年力正強乃以逆匪竄擾舒城捐軀盡節悼惜
殊深可追贈尙書銜照尙書例賜卹其子編修呂錦文服闋後以
侍讀陞用所有隨員幕友盡節姓名均查明請卹又

諭曰贈尙書銜侍郎呂賢基素懷忠義大節無虧可建專祠於舒
城以慰忠魂光卹典並賞內庫銀三千兩交錦文嵇領赴安徽
扶柩回籍治喪尋賜祭葬予謚文節並入祀京師及本籍昭
忠祠八年入祀鄉賢祠公力崇正學行身植志不少苟詭隨者見

之蹙然無所容在臺垣伉直敢言感時事至涕泣不食每入對痛切懸陳聲淚俱下

文宗屢爲動容疏出天下傳誦何文貞桂珍著續理學正宗唐確慎鑑著學案小識公皆以進呈藉爲正學之助有議其迂者毅然不爲止其出治團防也自知不返別母行痛哭不能起烏虞公之志蓋夙定矣錦文官侍讀兼襲騎都尉

贊曰公恂恂儒者不知兵其出治團練也又無兵無食但提空名殺賊以忠義激勵鄉人欲以遏方張之寇難矣然公所能自主者一死報國耳狂寇旣逼誓死殉城較然不欺其志豈不偉哉太史公曰知死必勇公之死所繇重於泰山也夫

何文貞公別傳

公諱桂珍字丹畦雲南師宗人道光十八年進士選庶吉士年甫冠乞假歸娶旋授編修督貴州學政擢侍講直

上書房公所學以宋儒者爲宗柘城竇先生克勤著書明理學流派曰正宗公續之於朱陸異同辨最晰又以己意增輯西山真氏大學衍義手繕進 優詔納之廣西盜起數抗疏言軍事得失論前大學士某前總督某誤 國不宜發軍前疏畱中天下想望風采咸豐四年五月出爲徽甯池太廣兵備道時安徽久陷改省會廬州仍被踞巡撫福濟公提督和春公軍廬屬之店埠公所治在江南阻於賊大府遂疏畱江北檄公募勇隨征餉無所出久之得

二百餘人率以西至霍山號召鄉兵得三千有奇激以忠義以十月一日破李兆受於霍城東追擊至麻埠又五日至流波嶂李兆受者故河南捻匪魁也有眾數萬至是爲公破又檄商城固始諸團丁扼歸路而自率所部進追捻黨大敗兆受與馬超江等相繼降散脅從萬計百姓懼呼餽糗糧不絕先是大府檄公援廬江檄未至廬江陷竟劾公奪職軍民皆不能平會會侍郎督楚師克武漢大破賊田家鎮遂圍九江公通牒楚軍言戰狀侍郎具疏於朝副都御史袁公時軍臨淮亦欲資公兵西與楚師會公至斬水矣爲地方吏所尼不得前居亡何九江軍失利武昌再陷侍郎入江西遂隔絕不相聞公孤軍轉戰濶霍閒五年正月克斬水旋克

英山殲悍酋田金爵大府檄公駐英山然公任事八閱月支見銀止三百兩不足供一夕炊民兵相從日多又益以兆受降卒無所得食初人日餉麪一觔遞殺至四之一猶弗給五月十一日師遂潰方兆受之降也公請糜以官秩大府難之至是絕糧意不能無望徒感公忠誠不忍背無何超江爲土人所殺兆受顧公拘其仇弗得益大恚則設位哭弔捻黨麇集於是皖豫諸帥爭以兆受反狀聞榜於衢購兆受頭千金兆受詣公自陳公推赤心拊慰之稍定矣會當道以密書繇驛達公屬先發制之書爲兆受得兆受謂公賣已也遂以十一月三日伏兵戕公於英山之小南門焚其屍屍之從死者四十七人公正命時有白氣如足練自屋瓦出逾

時乃滅年三十有九後二年當事復招兆受降累擢江南提督而公之死無過問者或反用爲詬病曾侍郎駐軍宿松爲立石英山紀其事及克江寧特疏訟公屈 詔贈布政使子謚文貞賜祭葬如令典

贊曰公以書生提空名殺賊無餉無軍資無賞罰權而曰與反側子居失廬江在奉檄前遽入公罪又以一紙速之死烏虜公何負於人而至此極哉公在翰林劾權貴中外久仄目謁大帥侃侃陳軍事若將爲之師者然以是積嫌公公且死不知悟也禍所從來微矣哉雖然古虧臣烈士蓋未有不橫被冤酷而能不敝於干載者也

羅壯節公別傳

公羅氏諱遵殿字澹村宿松人生八歲而孤篤志力學道光十五年進士以知縣發直隸權肥鄉南樂雄縣事補唐山調清苑擢冀州知州遷湖州知府調杭州擢安襄鄖荆道調湖南鹽法道天府疏畱權湖北按察布政二司使遷兩淮鹽使大府再疏畱遂除湖北按察使晉布政使擢福建巡撫調浙江此公厯官階級也公在清苑卓薦引見

宣宗皇帝有本色書生之諭賞加同知銜在湖州襄陽名薦治行第一以克復安陸及京山賞戴孔雀翎明年加按察使銜及撫閩湖北巡撫胡文忠林翼舉公自代雲貴總督張公亮基疏請

調公撫黔

文宗皇帝皆弗許。陞見。召對六次。公具陳民困及軍事得失。
上嘉顏納之。歸途調撫浙江尋死寇難。

文宗溫旨賜卹。予謚忠愍。江督曾文正國藩及胡文忠會疏上。
公妻徐氏。婦女陳羅氏。族姪姪婦周氏。同時殉難。狀請

旨旌表。並請於浙江宿松各建公專祠。以其妻女姪婦配食同殉
之履婦金梅氏。家丁顧斌均祔祀。

詔曰可。亡何御史高延祐據浮議劾公有

旨罷卹典其殉難妻女應得旌表。仍照例辦理。明年曾文正諭公

清忠大節。

穆宗皇帝特諭仍遵

文宗初次

諭旨照巡撫例從優賜卹其妻女姪婦及雇婦家丁一併旌卹乃贈公右都御史銜予謚壯節賜祭葬賞騎都尉世職入祀京師昭忠祠暨本籍府城昭忠祠既而浙撫請建專祠於杭州皖撫請建專祠於宿松湖北督撫疏請祀公名宦並得

旨允行此公歷承恩眷及死事卹典也公爲治務約已而厚於民去南樂任民建生祠祀之守湖州值漕政抗弊民抗納大吏將威以兵公單騎往諭悉解散輸賦如期爰建書院於南高橋以正士習烏程馬令以治漕故須假萬金集事公稱貸速其成亡何

馬令物故公節衣縮食代償之初不屑意也涇湖四載擒劇盜百餘郡大治在襄陽行保伍法簡壯丁置左右有功斂者捕治之增遺義學十餘所益鹿門書院資錢會粵寇起公手定章程檄所屬一律治團練楚北團練自公始咸豐二年賊陷武昌土匪郭大安糾黨行劫謀應賊公獲大安誅之殲其黨三百餘人三年權按察使躬歷蘄黃下游勘水陸形勢擇地駐兵扼賊會捻匪竊襄樊公回襄督治團防建礮臺十餘凌城濠數千丈治戰艦數十艘賊知有備不敢至明年武昌再陷皖賊陷德安安陸荆門諸州郡公帥五千人出屯王家河石灰窯歐家廟等處擒賊衝尋克復安陸京山二城八月曾文正克武昌賊遁明年春武昌復陷賊卒不敢踰

襄境六年大旱饑僞翼王石達開上犯楚大震時方罷遣川豫勇
過襄燭亂土匪高二先鹽梟馮一興應之大掠襄樊公帥民兵乘
城守援兵至夾擊大破之擒一先賊平方事之殷奸民劉朝義等
爭響應號八大頭目公密檄鄉團縛斬之是年大興克武漢全楚
肅清公以盜賊多起飢寒勸置社倉七十餘所立法擇人司之瀕
行猶以稅餘飭修老龍隄捍水患洎任兩司選良吏蠲漕費表節
義侍東征糗糧時胡文忠進規皖豫養兵勇六萬月餉四十萬緡
公力籌濟無闕乏用人不拘資格嘗曰用劄一刀筆吏耳况今有
事時乎會文忠銜恤歸公代行巡撫事仍兼署提刑庶政罪舉李
忠武續資師覆三河各軍議退保楚臺公持不可令扼宿松太湖

而檄李勇毅續宣一軍駐蘄水英山相掎角大局以振未幾文忠
起復帥師屯黃州用人行政倚公如右臂當是時楚北吏治軍政
用天下蓋公力爲多其撫浙也以浙中吏習奔競痛除積習舉劾
十餘人又以浙兵向不足特資皖南兵爲屏蔽驕不受節制乃疏
請以張文毅芾總防務其地漕捐輸別遣官督理又乞師胡文忠
曾文正請選將徵兵爲自強計部署未定而難作此公厯官治蹟
也公學以不欺爲本好宋五子書及名臣言行錄儒先語錄嘗手
寫其要爲一冊曰正學指歸在官嚴義利之界屬吏莫敢以筐篚
進所至革州縣供張服食如寒素嘗言世治亂視吏貪廉吏貪廉
視身奢儉欲反亂爲治非廉儉無以立節以此自勵亦時以此勉

人所識拔人才必先操守氣節若端愍公多山李剛介標金果毅
雲門其最也在吳興識趙忠節景賢後卒以勳烈顯入觀時有
權貴人枋政蠹吏不造謁輒中傷之公不往遇諸朝一揖而退尤
好扶植善類於君子小人進退消長每有見聞其憂樂必深至在
官不爲子弟營仕進第令讀有用書近正人而已此公生平學行
也僞忠王李秀成之間道犯浙也在咸豐十年二月或勸公出營
城外疏請以將軍守城公叱之曰是棄城出走計也吾受國恩
重肯苟活爲萬世羞十九日賊薄城公與將軍忠壯公瑞昌調民
開及駐防二三千人使分堞守杭城周四十里兵少力不支適陰
雨連旬公日夜行泥淖中撫慰疲卒守陴者皆泣歎乞援軍不至

公知事不可爲諭家人各爲計徐夫人忼慨言曰君死妾何忍獨生爲君家婦四十年尚不我知邪長女適陳穎秀早寡歸侍父母嘗刲股療母疾至是踴且泣曰未亡人忍死八年以父母在耳今願相從地下公族子忠傑婦周氏嫠而貧公挈之任所亦誓從公夫婦死先是公生時夜忽光明如晝因小字有光是月二十五日夜有大星隕節署前之鳳凰山公指且歎曰事可知矣二十七日賊穴地竄火藥轟清波門城裂二十餘丈賊入公被刃傷額墜馬親卒掖回署中遂仰藥至則夫人及女皆先仰藥未卽死同趨署之西院聯繯就縊賊至周氏及雇婦金梅氏家僮顧斌皆死焉公年六十有三時將軍瑞忠壯因守駐防城越六日江南兵至賊遁

杭州復將軍入撫署見公貌如生公女猶兩手抱持母僵立六日不仆此公死事及閩門殉節狀也烏虜公之死烈矣而其尤關天下安危者則在備兵襄陽力固上游厥功爲尤偉何者荆襄天下根本而襄尤當南北之衝全楚必爭地賊陷武漢時儻急趨荆襄乘虛擣中原擾畿輔事有不可知者其走吳會直爲子女玉帛計識者知其無能爲也然荆襄非宿重兵爲之備禍仍不知所底惟公首以團練法部勒襄民使不從賊且殺賊同時官文恭以荊州將軍遷總督屬兵上游得建瓴之勢公與同心戮力前後十年雖武昌三陷漢陽四失捻匪復時伺隙而公所轄三郡一州迄不被兵其後胡文忠官文恭再造鄂贛率以荆襄爲根本此尤功在天

下尙論者或未盡知歟公舉會試與會稽陶文節恩培通州孫文
介銘恩旌德呂文節賢基同出長白文端公倭仁之門時稱倭門
四節公子三忠祐襲騎都尉湖北候補知府加三品銜忠誨忠訓
贊曰元度生未識公辱公疏調先以書有知己之雅聞浙警方卧
病山中急募援軍戒塗噩耗至已無及矣悲夫喪歸宿松胡文忠
曾文正偕今相國合肥李公湘陰左公往弔哭元度從造其廬土
室十數間耳爲外吏三十年田止四十畝家屬至無以自存卽一
端已足不朽况一門以內臣死職婦死夫女死父母僕死主固宜
與星月爭光也哉公事在國史文士例不當爲達官立傳然攷
太平御覽引漢唐別傳至百一十家故援茲例以應忠祐之請云

趙忠節公別傳

公諱景賢，字竹生，歸安人。父諱炳，言道光六年進士，官刑部侍郎。公少豪邁，負奇氣，不拘小節。讀書慕古俠烈士，喜任人所難有機權，臨事輒能斷。道光二十四年舉人，以父子異籍被議黜，入貲得復授宣平教諭，改官內閣中書，未赴。丁父憂，閉門讀禮，鄉人未之奇也。同郡徐撫部有壬獨器之曰：「君有應變才，將爲國柱石。」慎自愛。公亦以時事多故，思得一當以自效。咸豐三年，賊犯江甯，江浙震動，詔舉行團練法，公獨任其事，輸重金爲眾倡，得

旨加道銜，以知府發甘肅用。未幾，甯國復，湖州得解嚴。十年二月，賊復陷甯，郡廣德直趨湖州。公時在蘇州，聞警馳歸，與湖州守瑞

春歸安令廖宗元烏程令李澍等籌守禦當是時士皆虛伍官無
見錢計莫知所出公曰事急矣今市肆雖空百貨未盡徙也宜權
取充軍實事成有以謝父老否亦免爲盜齋遂下令有不聽取者
治以軍法不半日事粗集公曰未也今城外民塵如櫛賊至窟其
中城將不能守乃縱火燔之江南援兵至賊已圍攻西北城公部
署既定納韃刀乘城誓必死遂約援兵夾擊斬賊數千圍三日而
解時二月十七日也有

詔以道員用賞額爾德木巴圖魯賊繇埭溪攻杭州越十日外
城陷巡撫羅公遵殿死之將軍瑞昌公死守滿城未下會提督張
公玉良自江寧馳援過湖州公遣將引道復杭州王壯愍公有齡

繼爲巡撫壯愍夙知公才至是深相倚湖防事一以委公乃益繕城隍備器械造戰艦築牛馬牆分勸各屬鄉鎮治圍練閏三月遣將復長興德清安吉孝豐武康五縣時蘇常迭警援軍皆調歸惟存新軍三千公悉心校練且添募四月蘇州陷延及嘉興分兵駐南潯鎮以扼其衝未幾僞輔王楊輔清自宜興溧陽太湖來犯眾十萬沿城大掠火光燭天刁斗聲聞數十里公閉城堅守意氣自若曾記名道蕭公翰慶自石埭來援轉戰賊境五百里將至湖州馬蹟被害所部敗散入郡城公拊而朝之兵力稍厚時賊眾已圍五門公親督隊開北門出血戰數晝夜斬馘多賊遁二次解圍得旨以道員記名節用聞張公玉良攻嘉興公卽帥師出南潯進攻

吳江之平望鎮踞賊數壘據守之思卽復蘇州成不世功僞英王
陳玉成忽自太湖窺湖郡公急回救賊反乘之師潰賊復踞平望
并犯南潯鎮公再集民兵擊走之六月分兵克廣德州時杭州圍
解敗賊仍竄湖屬十月省城再被圍公帥兵往援圍甫解入謁王
壯愍忽湖防告急卽馳歸賊已至南門之峴山副將劉仁福者故
興臺也自平湖潰歸通款於賊率廣勇二千自昌化來僞爲援兵
謀入城內應公偵得實陽治具款之而止其兵城外陰簡精卒出
令人束竹筋於腰爲識圍而盡殲之磔仁福於市竿其頭示賊賊
爲奪氣解圍遁十一月嘉興烏鎮之賊分途來擾雙林鎮等處王
壯愍遣副將文瑞來助勦合民兵轉戰十餘日悉破其壘

詔以三次解圍功賞按察使銜十一年正月遣兵再克長興有
賊自宜興陸路來犯敗之會太湖之洞庭東西山失陷全湖皆賊
有長興既不能守而北路七十二渡港時被擾遂於大錢口添駐
水師聯絡民兵通禪道大小數十戰皆告捷五月大股賊來踞菱
湖鎮公親督水師礮船分路夾擊大敗之奪賊船數百艘生擒數
百人七月平望賊竄南潯鎮與石門賊兩路來犯皆走之九月賊
來益眾乃督水陸出塵戰五晝夜賊始敗退適太湖賊又來犯來
浦連敗之回郡忽報杭州被圍賊營互六十里餉道絕遂親督水
陸軍往援連破賊隘口二十有奇終不能達城下洞庭東山賊僨
公南向乘虛犯大錢口公急回顧且戰且退既至大敗之奪城二

百餘艘始遁去而從逆之烏鎗船匪肆掠雙林鎮復遣兵聚殲之亡何杭州陷公歎曰湖郡成孤注矣惟當效死勿去以報國恩耳遂與在城文武紳民誓死守眾皆曰惟公命僞忠王李秀成遣二諜遺書招降公立斬之以書達上海呈江蘇巡撫轉奏始奉簡授福建督糧道之

命時四面皆逼賊烽惟畱大錢口一線路十二月二十七日大雪三晝夜冰厚數尺如平地礮艦膠不能動同治元年正月二日賊乘夜來犯大錢口遂爲賊踞自此內外隔絕餌道不能通矣賊屢受湖防之挫死傷山積恨次骨掘公父墓相戒勿近攻先是賊陷名城率用地道湖郡地勢低掘地三尺卽見水技無所施又四面

環大河雲梯衝車無所用惟築壘樹柵漸進逼爲坐困計二月朔公選死士三千誓解城圍繇南北門出擊各掃十餘壘獲賊糧運入城自是賊糧不復屯近處而城內外水陸兵勇尙八千有奇男婦十一萬餘口糧且盡越二日奉飭赴福建新任及賞加布政使銜之

恩命軍氣復爲一振蓋是時

上甚惜公才寄諭垂詢江督曾公密令輕裝赴任移其捍衛桑梓之力以固閩粵公感泣誓死益堅密寄帛書至上海報其叔父炳麟有眾志成城守死善道之語且云使我家出一良臣不如出一忠臣公之志蓋素定矣自三月以後軍民羅雀掘鼠食草根樹

皮皆盡公言笑如當時縣丞某欲通賊事露立擒斬之有搜掠者
仍按軍法五月三日城陷公大呼曰死無憾死我十數萬軍民爲
憾耳賊渠譚某擁至局公冠帶見賊喝曰速殺我毋殺軍民譚曰
亦不殺汝公拔刀自刎爲所奪執之去僕陸二自刎死公被執至
蘇幽諸獄遷禁甚嚴求死不可得脅降不屈李世賢復爲下士狀
百計誘說不爲動遂有遺歸之意譚逆不可世賢赴江北時誠勿
殺譚稍稍善視之公見輒詈罵一日攜常熟地圖以詢遽投之火
二年三月賊自太倉敗歸揚言公將襲蘇譚逆懼十八日日晡招
公飲酒半詰公曰汝通妖兵邪公曰我本官兵何謂通汝欲獻蘇
州邪公曰蘇本大清土地何謂獻卽又曰汝死期至矣公仰天

大笑曰求之一年而不得今何幸也連舉數巨觥罵益厲譚逆舉
洋鎗對擊其胸而墮年四十有二賊目棺瘞之公身材不踰中人
貌偉異口可容拳大小百餘戰皆親冒矢石天性好殺嘗曰吾得
殺人下酒乃快事耳所俘賊皆浮白斬之後見曾文正解散歌始
悟脅從皆獲免湖州既陷廷旨數詢公下落事聞

優詔褒閔且曰趙景賢係在籍紳士無守土之責集圍禦侮每戰
必捷迨至孤城困守糧餉軍火俱盡仍堅持數月力盡被執賊匪
誘脅百端矢志不移卒以身殉勁節孤忠可嘉可憫其改照巡撫
陣亡例從優議卹且賜謚於湖州建專祠其長子趙深彥一併附
祀事蹟宣付史館立傳以彰忠盡次子趙濱彥潤彥滋彥添彥深

彥均俟及歲時送部引見尋

賜祭葬

予謚忠節公在繫作絕

命詩四章有云亂刃交揮處危冠獨坐時又云厚貌徒爲爾孤忠矢靡他僞忠王本欲送公歸致書以漢壽亭侯歸漢爲言公斥其儻不於倫且曰歸我者之爲知已不如殺我者之尤爲知已也初杭州旣陷公知事不可爲盡遣其家屬出而身居守深彥年甫十二寓湖南聞湖州失大慟服毒死南撫爲奏請

旌卹

贊曰軍興已來死封臣死職死綏者僂指難畢數然皆有民社責也若其以鄉紳毀家紓難率民兵登陴效死抗數十萬之賊血戰三年殄賊萬計迨行省陷列郡盡淪賊猶死守孤城六閱月力竭被執幽繫經年百折不可回卒罵賊以死如公者豈非古今所期

見哉雖然烈士徇名爛千古未有之烈茲其所以獨立千古歟

江西委用道前翰林院編修帥君傳

君諱遠嶧字仲謙一字逸齋黃梅人曾祖某邑諸生祖承瀛嘉慶丙辰進士及第第三人累官浙江巡撫父敬時以任子觀政戶部君生負奇才讀書慕古人奇節偉行視時俗渺當意者然內行敦飭無子弟之過充道光丁酉拔貢未廷試以父憂歸辛丑巡撫公卒

成皇帝篤念蠶臣特賜君舉人丁未成進士選庶吉士假歸值邑水災道殣相望君請大吏發帑賑力肩其事家故貧配石恭人媵嫁田百畝急斥之輸其值爲眾倡所全活無算己酉授編修御試列二等與文綺之賜明年廣西巨寇起越二年自岳鄂踞

金陵東南列郡魚爛不可支

朝命大帥專征多失律守土更輒棄職逃一二秉政者號稱鉅人長德又皆持祿養交泄沓不任事君憤甚居嘗拊髀歎曰時事至此吾世受國恩職侍從不擅擇一言其曷以稱

上明旨卽死何以見祖考地下癸丑正月上封事二約萬言大旨在一兵權申國法求人才籌國用而指斥當軸尤切至謂宜避賢路滌肺腸至論軍事則請先正失律者誅疏入

上畱中時蒙採錄而所謂鉅人者則固世所交推初未有訟言攻之者也是年分校禮部試稱得士以修墓請告歸曾家鄉淪城僑浙中忽忽踰三年君旣痛其言不盡行思欲一見諸實用以自考

證援例以道員候選初君在京師懷奇負氣不妄交所與游皆當代名人以經世學相切劘而於湘鄉曾侍郎尤篤歲丁巳侍郎督師江西君走謁戲下至則侍郎奉諱歸矣當事欲侍郎墨經再起趨君勸駕君徒步抵湘居布月返江西大吏疏畱君然止任以勸輸軍餉戰陣非所責也會僞翼王石達開自皖南至江軍屢敗贛水以東無完土君奮請自領一軍與賊遇募卒千人偕副將周鳳山進時總兵李定太扼賊撫州路君以十月六日抵東鄉越日賊大至迎擊十里外賊卻別賊從閒道趨君壁留守者僅十之三驟不能禦親卒請潰圍出以繼進君怒叱曰此何時尚顧身邪手劍直前搏戰力竭死之屍被殘從兄壽九以布政司理問効力軍中

同遇害大吏入告

詔優卹君爲人倜蕩仇俠麾斥千金不屑意赴人之急蹈水火不辭寓嚴州倡建千人塔爲掩骼計友人來京邸暴卒君質貂裘營葬塾師戚某其父客吳門臥病君逆以歸終於家醫藥喪葬皆任之詩古文超邁有奇氣遺集若干卷年四十有一子四長曠殤次畹襲騎都尉次甸眷均幼女子三

論曰自公孫宏匡衡張禹孔光之徒持祿保位被依阿之譏其宗派至今未墜彼皆號稱儒者考其行若無可非刺而陰探人主之隱爲從違不敢一言自異遂足禍天下而有餘善夫宋尹源曰人臣不忠孰大無過爲大嗟乎世之但求無過者何多也君規切政

府有以哉。有以哉。君以憤世故，慨然一出自試，遂以亡其軀，可哀也。已彼容容者，且謂君偏詖矯激，不概於中庸，而宜以賈害也。悲夫。

逸齋君之以勸起曾公來湖南也，僕時寓家長沙，適邀郭筠仙飯。逸齋卽與偕至，前未相識也。偶然驚人語：兵機平賊無難者，僕竊奇而壯之，而微贊其福，相疑若不多。任功名，纔數月，遽聞逸齋以戰死，悲夫！兵事之得失，固亦有命焉，而非其人之所能自主者邪？然世之所謂福命人者，類如張禹孔光其人，此又逸齋之所極憤予之而甯死必不願有者也。讀此傳，益爲悲感。輒附記之。咸豐十年九月初三日吳敏樹識。

天岳山館文鈔卷十二

劉豫川李寶秋別傳

咸豐五年十月十日江西候補知縣劉君豫川李君寶秋戰沒於瑞州之南門事聞各贈知府銜優卹如制始余以正月隨督師曾侍郎入江西募鄉人殺賊部勒爲五營曰平江軍其三隸余其二隸兩君同駐南康攻湖口旣而兩君奉檄援瑞州至是同日死後四年乃獲摭其遺事爲之傳

劉君諱希洛字豫川祁陽人道光丁酉拔貢舉丙午鄉試以知縣試用江西權德安癸丑夏粵寇陷九江君率鄉兵堅守兩晝夜城破兄諸生希濂死之同殉者七百餘人君勵以身免奪職仍任事

乙卯二月率平江軍隨羅忠節公克弋陽廣信功最得還職六月抵南康七月與余及寶秋渡湖克都昌攻湖口入其郛惟石鐘山堅壘未拔方搘要爲久攻計九月僞翼王石達闢從通城義甯入江西當道檄君援瑞州李君繼之湖口當皖衝余軍日減眾方爲余危賊甫至江西莫審眾寡虛實當道易視之雖兩君意亦謂功可立就俟西路靖乃復東耳十月九日賊前隊至瑞敗之旋訶知賊眾且悍或勸君退守乞濟師君曰瑞州距省會百二十里無險隘可扼退則直抵省會矣奈大局何李君然之翌旦賊果大至開壁迎擊殺數十百人賊來益衆遂閉關相持礮彈盡碎釜鐵代之塹以外賊屢屢蹙賊反緣伏屍進君馳入李君壁李方痛飲決死

戰君返壁率壯士童隨鵬等數十人陷陣力竭死之君面頹工書善飲氣充然和而遇事有執持卒年四十七母年七十餘後七月遺腹子生

李君字寶秋諱琨陝西山陽人道光乙酉拔貢丁酉舉於鄉權江西宜春縣事甲寅三月楚軍克湘潭敗賊竄陷萍鄉萬載獨宜春得全以君治鄉兵扼之也大吏才君故以平江軍相屬君少髭鬚痘癬微著面善談好飲客駐南康盛暑余與吳編修嘉賓郭編修嵩燾皆晤就君時鄱湖以東皆賊藪都昌徐家埠爲賊聚糧所君率三百人約水師襲之大獲港狹舟不能進君登陸徒行二十餘里及克都昌攻湖口城君與豫川暨余露宿山椒兩夕礮彈徹左

右君劇談自若先是君當權知樂平以治軍未赴至是當事欲君乘輜星子星子故瘠區亂後廬舍蕩然君方奉簡書馳驅有勞顧移就瘠苦地恚甚聞援瑞之檄遂投袂行曾侍郎使人止之湖上已不及矣方劉君之馳入君壁也君曰丈夫死耳夫何言乃舉觴自酌又酌劉君曰吾與若當手刃賊酋不徒死也既而劉軍火起君開壁馳突所乘羸蹶君徒步手長矛鎌一賊斃之一賊以大刀夷君股遂被戕年五十一婦某氏有能聲子蔭叟六歲後三年瑞州克君婦攜孤子覓遺骸遇戰骨輒瀝血驗之終不獲嗟乎兩君所部千三百人耳石逆眾稱十萬此如以跛牂委餒虎豈待智者知其危哉然兩君卒不肯潰退辱國所部皆從死如歸無倖脫

者瑞州陷獨兩君與所部死耳賊亦卒未敢輕犯省會自兩軍覆後江西列郡皆淪陷湖口功卒不就余移軍撫州復移防信州路又四年萃楚諸軍之力乃就肅清而兩君不及見矣悲夫

卹贈同知侯選教諭耿君別傳

李元度曰自軍興以來海以內死封壘死職死綏者何可勝紀或勳業已就完節而終或倉猝計無復之資恨以歿其有負經世才足爲國家任重寄無賢不肖皆心服其爲人所設施未見涯略逮天闢以死以予目中所見未有如吾友耿君者也嗟乎耿君造物之生才有數如君者蓋千百人中不一獲者也天生是才必有所以見其才者旣闢之使不得自見矣而必生是才者何哉君諱光宣四川隆昌人輔臣其字也咸豐壬子副榜就職教諭中表戚郭君毓龍令彭澤招之至則彭澤爲寇陷客貴溪令所丙辰春江西大吏募平江勇三千人以鄧君輔綸林君源恩爲統將湘鄉龍汝

霖言君於鄧曰此命世才也鄧君卽自返君屬以左軍凡千人始江軍克進賢師或不戢多拾賊遺物且擾民君上書統將凡數千言立擒斬二人全軍股栗攻撫州戰必身先夜用長梯襲城君必抵城下江楚軍相距約四里楚軍受敵君救必先至左軍轍尙藍眾見藍旂軍至則皆喜曰耿公來矣賊亦畏藍旂軍嘗避之居亡何鄧君中蜚語罷撫城久不拔援賊屢至士卒傷病過半餉且竭在事者皆託病去林君勢孤甚客或語君盍早自爲謀君正色曰謀人之軍師去將焉往彼能自爲謀者將遂長不死邪林君聞之以告余爲歎息不置會分兵克宜黃崇仁賊詗知官軍驟滅曰捐戰我軍力禦之戰皆捷九月八日賊復出犯敗之追奔抵城下蓋

未亡一卒也。將歸壁。忽城上巨礮發。中君少腹洞穿。血暴下。眾環哭。君搖首曰。無哭。君等好爲之。遂瞋。君貌嚴冷。不苟言笑。余一見敬憚之。在軍短後衣草屨。與最下卒同甘苦。俸糈所入。纖毫不以寄。家死之前夕。猶書軍約十四章。訓諸弁目。諄諄以步伐未齊。申誠。君所部視他軍爲整矣。然猶不自得如此。余嘗過君。值君頒餉。以赫蹏紙手書名數。散之未移晷。盡六百餘紙。而目營口答。皆不紊。余益服其吏才。卒年三十有六。無子。贈同知。賜卹如例喪。歸。各弁皆搏膺哭送。雖夫役未識君面者。皆掩袂泣。烏虖。此豈可倖致也哉。自君坳後。軍氣益不振。未旬日。遂有覆軍之變。眾以是益思君不置也。

宜黃縣知縣傅君別傳

君諱培峯字藕村甘肅鎮番人道光丁酉拔貢甲辰舉於鄉丁未歲進士咸豐癸丑授宜黃縣知縣時粵寇踞江寧烽火徧江南北君攜兒子建遠單騎行會賊犯江西行省圍解君始抵任其爲縣以至誠格吏民衣履皆布素見者不知爲長官丙辰二月賊犯撫州主兵者臨川令馬永熾先期遁各屬皆陷宜黃無一兵紳民強拔君出自是常邑邑顧影悲嘯憮然若不可爲人三月余及鄧君輔綸林君源恩帥師攻撫州屢戰不能下八月君來乞師乃分軍克宜黃崇仁君謀餽餉用文告勸邑人其略曰某守土無狀法當大辟所爲乞師復城者冀解民倒懸自贖也今復覲顏勸父老輸

餉豈得已哉其言至深痛邑人爲感動會撫州軍失利退保崇仁
旋奉檄移防廣信遂強君俱行戊午四月賊竄浙中江西郡縣以
次復君再蒞宜黃則益治鄉兵爲守禦計請蠲六七兩年田賦大
吏難之固請卒獲免八月望日官軍克吉安逸賊千餘人竄縣境
君率武舉紀鳳翔等守孤嶺別遣鄉兵扼羅方嶺二十日昧爽賊
大至鳳翔死之君急入城拒守調鄉兵未集賊自北門登君服緋
衣北向再拜自經未絕而賊至脅君降君罵賊甚厲賊怒支解之
焚尸小東門外同死者幕客施淦舉人黃秩泓張受勤一稚僕在
旁顧獨免翼日賊遁建遠獲殘骸數段殮以歸士民皆哭曰吾民
負公事聞 賜卹如例 詔宜黃建專祠祀君而以鳳翔淦及秩

滋受勤祐君卒年五十有五

論曰軍興以來棄城圖存者相踵也始猶思罪繼且習爲固然寇退則反益視遺黎爲魚肉能引咎自効者余所見君一人而已然而絲君之道則必死死必慘且酷爲彼者則皆康其身豐其祿秩長吏亦卵翼之自古迄今莫不然豈蒼蒼者好惡固與人異趣邪君嘗痛作吏者喪心厲民言輒悲憤會歲除上饒令公讌酒半君太息言亂後民重困吏方急催科鬻子女不足供稅課語侵令令亂以他語君辭色益厲坐客皆罷酒目爲狂怪烏虐此足以見君之志其卒以死豈偶然哉

湖南三節令傳

三節令者咸豐十一年並以知縣死職湖南者也東安縣知縣趙君諱榮祺字雲伯大興籍紹興人道光辛卯舉順天鄉試咸豐初揀發湖南權知慈利沅江縣事有惠政君羸而疏鬚煦煦如老嫗眾呼趙母先是九年秋賊陷東安知縣李君闔門殉公廨盡燬市爲墟越數月君單騎之任時楚南數被兵州縣正賦悉索以償各軍逋餉縣庫常不名一錢十月十五日賊復至白幟蔽野君急嬰城守時羸卒不滿千餉無出請援不至相持一晝夜賊肉薄登城守卒潰君急返署伏劍未殊遂被執君大罵曰死賊吾恨不生敵雨遂遇害長子燕堂亡匿他所聞君死奔而出枕屍股哭罵與幕

容胡玉林並死之玉林字琅笙亦紹興人

城步縣知縣諱安和字治亭佚其姓滿洲正白旗人也長不滿六尺鬚黃目短視道光辛巳舉人咸豐二年以知縣發湖南署辰州府通判治浦市性介潔飪粥常不繼妻窮居京師力不能迎致某大吏過浦市入君署良久君始出大吏恚甚後察知君禮服付質庫故不能遽出轉益賢之君脫略好飲苦不得酒某寺有老僧年八十矣君數就之飲極醉忘歸其真率類此未幾補城步地瘠苦爲楚南冠又界粵西風鶴時警君抵任卽周覽阨塞爲戰守計會陰雨浹旬郊外多產人面豆司更隸夜見白衣叟長丈餘蒙袂巡牆行若啜泣狀公廨後古樹怪藤並數百年物有異鳥集其顛蕪

身黑首晝夜悲鳴聲嗚嗚君歎曰吾其殉此乎不數月粵賊陷綏
甯突犯城步君曰困於城不若禦諸境遂帥鄉兵數百迎擊諸要
隘斬數級賊稍卻已復大至眾潰君太息曰死於野不若死於城
城吾死所也駛馬馳歸署正衣冠北向拜投繯而絕賊至括其室
惟苦醞半甕敝衣數襲而已賊亦歎息去

綏寧縣知縣吳君諱熊初名鳳毛字樸菴烏程人道光庚子舉人
由敎習揀發湖南初令麻陽俗獵悍多盜有盜劫客舟金君捕盜
追金付客訖立坑盜六人以徇縣人讐伏尋補通道地苦窳而民
樸極吏耕於野狃戶草生君治以廉靜卓薦調綏寧綏寧故巖邑
與粵西接壤君下車卽銳意治團練作爲詩歌期以戶曉庚申九

月廣西白巾賊以突騎數千一晝夜馳二百里直薄城下營弁哈某迎戰敗績君登陴守禦以寡眾不敵陷君及其三子鑑並死之初君爲諸生嘗祈夢于忠肅廟夢入小屋壁上作書云散絲絡女爪黃金冠獮猴莫恃合著口終防白了頭不解所謂旣殉難解者曰女上爪散絲絡之綏字也庚爲金申爲猴庚申年也合曰哈某也白頭賊皆白巾也烏虜數果有前定者邪

贊曰三令君同時死職事聞並贈卹如制死固重於泰山哉海甯俞大令鳳翰嘗各爲之傳蓋得諸目擊而吳君又同年生也俞字石年道光庚子領解額嘗權平江篆能詩古文及書畫所作三君傳特工今下世又十年矣貧無子遺書並散佚余憇其漸湮滅

也爰合傳以存其略云

吳伯俞傳

烏摩自粵寇稱亂以來荼毒半天下吏或不能守土主兵者多縮
胸不前其有城亡與亡力戰死壘場者事聞則褒卹之典立至
贈秩賜祠蔭子孫罔替雖卑官末吏皆得以其事付史館立傳
至如韋布之士倡義兵殺賊不幸血戰死吏不及以聞朝廷之
恩有所不能逮鄉之人久且莫能舉其姓字豈不悲哉至有負才
嚮學方駸駸曰進而賛恨倉卒以歿者尤足深恫若吳君伯俞之
死余覽其事哀之君諱昌籌南豐人伯俞其字大父曰耀祖安徽
通判贈翰林院編修父曰嘉思丁酉舉人雲南知縣擢同知君
生有異才讀書能見其大年十九補諸生咸豐六年賊陷建昌七

月居南豐城君所居在邑東鄉距縣治九十里地險僻君與鄉父老子弟築壘守隘有警則鳴鉦匈眾禦之賊不敢逼七年春賊犯二十八都之長嶺隘距君宅五里君荷戟疾馳禦賊棚外隘破歸路絕與叔嘉文從弟連貴皆死之正月二十七日也越日得屍喪其元妻韓氏以七月十九葬君之前夕縊以殉君卒年二十有二無兄弟無子女二人

論曰余與君未識面讀君贈劉生序峭折無纖塵問其年甫冠余灑然異之西江古文之學自寧都易堂後新城魯進士仕驥陳侍郎用光皆以桐城姚氏爲師友君世父子序編修尤有聲當世君耳濡目染遺文數十首皆足與編修所論相發明自科舉之業興

非有志者不得與於古有志矣才或不足以赴之君年少氣清承
家學所詣殆未可量度而卒以義死烏虐茲豈獨吳氏之不幸也
哉

鹽運使銜江西鹽法道余公家傳

公諱正煥字章甫一字星堂長沙人曾祖成奇祖勝華父啟武世有潛德以公貴皆贈資政大夫贈公有子四公其長也幼穎特年十四應童子試甲其儕嘉慶六年進士選庶吉士座師彭文勤公尤器之手所注五代史補注屬爲序尋授編修充國史館纂修日講起居注官與修

高廟實錄十二年考績稱最授陝安兵備道既至明斥堠聯保伍繕城隍頒農桑要說爲民勸時漢中守爲嚴公如煜公鄉人負時望者也公與相佐佑嘗單車按部考其山川阨塞要害繪漢南全境圖嚴公後著三省邊防備覽繇公發其端也廿九年豫匪岐眉

襄作亂犯漢中公與嚴公力禦之出奇計避勁卒易賊衣夜襲賊營賊駭亂自相蹂踐死馘其渠事平得旨賞戴花翎會滇中有野夷之變圍騰越調雲南迤西道公轉餉厲兵將進剿野夷恂懇解散乃建議改騰越州爲廳治設同知以下官駐兵防守邊圉慄然二十一年母憂歸服闋以贈公春秋高請終養道光元年主講城南書院八年以薦召詣闕相度萬年吉地奏對稱旨授江西鹽法道歲裁浮費銀萬有奇以豫章書院絀經費取鹺費銀八千兩爲舉本交商權子母益諸生餐錢前後二權按察使讞決必矜慎生平以興起斯文爲任其講學城南也書院爲朱張過化地舊基隘且圮乃移建城外躬相度爽塏規制閤闈手輯書院

志在江西復修豫章書院規制如城南士林至今利賴之十四年冬引疾歸種竹足不入公府昕夕課孫自娛初贈公嘗諭曰生平有志未逮者三一文廟圯未修一鄉闡號舍未蠲潔一族屬多貧困無以佽之至是公斥重金爲邑士倡大新學宮增輯學宮志自後鄉試領解額者累入科皆公邑人而公次孫肇鑽遂裒然爲癸卯解首云應童試例需卷費寒畯多不辦公與李公象鵠各輸金三千錢千貫買田納租充卷價邑人構祠地藏庵祀公與李公志遺愛也貢院及學使院轅門以外無隙地遇試期士多雨立公捐金各建坐棚又以貢院中缺溷廁穢氣蒸人乃輸貲築屋塹坑甃石闢以板扉眾稱便先是嘉慶初公捐建宗祠及是手訂族

譜作家訓四篇又仿吳中范氏法購義田千畝立義學於祠左右歲延經師一蒙師一子姓之材者皆入焉其貧且失業者歲資以錢帛會海畧有警首捐萬金助餉詔加鹽運使銜公之承先志好行其德多類此二十四年秋湘中諸耆舊會於城南妙高峰踵香山洛社故事鏤石題名以齒序凡十八人公時年七十一矣咸豐初諸老先後謝世公歸然稱魯靈光以三年正月二十日考終里第年八十有一子三人崇本官趙州知州峯本麻陽學敎諭加知州銜崧本廣東鹽場大使加提舉銜女一人孫十人曾孫十一人同治九年有旨入祀鄉賢祠

贊曰唐制入史館者先試撰大臣傳狀又實錄書人臣卒必約序

其生平賢否昌黎紀張萬福陸贊陽城皆順宗實錄中語也今實錄不書人臣事蹟史館非二品已上及死事者例不當列傳然則家傳宜獨詳矣元度與肇鎧同鄉舉猶及見公且備見諸舊英其時海宇承平士大夫優游林下流風遺韻至今令人追慕也況公之功在斯文祀在瞽宗者哉故因公孫肇鉤請而次其傳

敕祀鄉賢 封奉直大夫龍公家傳

同治八年十二月二十四日 封奉直大夫攸縣龍公考終長沙
邸第踰年大吏上其學行於 朝請祀郡邑鄉賢祠

詔下所司議覆其明年部臣以公清節闡修足矜式後學應祀法
乞如畧吏請

制曰可乃以三月望日迎主人入祠如典禮維時紳紱章縫之侶來
會者數百人僉曰公志潔行完於斯典也稱公子汝霖等遂以狀
屬元度詮次家傳按狀公諱友夔字襄堯曾祖璠舉人官蘭溪縣
知縣祖思見舉人累官泉州府通判父彬縣學生行誼並詳郡邑
志公幼從父學居郡城年十六隸縣庠又四年食廩餼時讀書嶽

麓能文有聲者公與湯侍御鵬勞文毅崇光羅文僖繞典並稱四大家然公爲文謹守先民繩尺不隨時俯仰同學多速化以去公守其法彌堅或勸少貶從時好公曰窮達有命從所好而已其弟子及其子皆堅守古法從遊者歲常數十人試有司輒遇而公顧以明經終公之學近薛河津以約己省身爲鵠不自弸襮亦不暇有所論著晚歲養益邃燕居無惰容性不言人過失人自憚敬之有不善者惟懇其知咸豐初詔舉孝廉方正有司以公應堅謝焉會軍興當事檄公督富民出私財佽餉或疑公必不赴公曰往役義也吾特持其平而不因爲利耳亡何同事不能如公旨公拂衣歸御史發同事侵盜狀詔巡撫遣官察治公慨然曰吾可

獨爲君子邪遂往對簿自引咎大吏夙重公事得不窮治其不惜
自汚屈以全人若此家故貧嘗避兵檳山值歲祲鄰里不能舉火
公假貸得百緡散之又嘗於歲除傾貲濟人急家反無卒歲資及
二子官中外祿養較豐乃用以營家廟治先塋於邑中諸義舉累
膺封誥自視與布衣時無異家人購華屋居之亦視與環堵無
少異也卒年七十有六子汝霖丙午舉人高平縣知縣升用直隸
州知州溥霖丙子舉人湛霖壬戌進士官編修女子子二人
贊曰不於其身必於其子孫豈不諒哉軍興已來鄉人士乘時會
立功建旌節視猶拾芥獨公蕭然無所預而其三子並以學行顯
於時爲循吏爲侍從臣公皆及見之科名不足異其無墜家學難

也公長女適茶陵譚孝廉椿祥譚客死遂以身殉有 詔旌其門
烏虜公之教行於家抑何偉歟古者大司樂合國之子弟凡有道
有德者使教焉歟則以爲樂祖祭於瞽宗若公者眞其人哉眞其
人哉

右春坊右贊善前翰林院侍講朱蘭坡先生傳

公諱璵字玉存學者稱蘭坡先生先世自姑蘇遷婺源再遷涇爲涇右族曾祖諱武勳 敕祀鄉賢以曾孫理貴 贈通奉大夫祖諱慶齋以孫理貴 贈資政大夫理官貴州巡撫公從兄也公考諱安桂早世妣汪氏未婚守志嘉慶十年 旌本生考諱安邦國子生本生前妣胡氏妣趙氏公生時奉遺命爲安桂公後既貴覃恩累贈厥考本生考皆爲奉政大夫妣皆太宜人公生有異稟嘉慶七年進士選翰林院庶吉士授編修充 武英殿纂修 國史館協修 實錄館校勘官十二年典山東鄉試充 國史館文頤館纂修十八年充日講 起居注官擢右春坊贊善十九年遷

中允敎習庶吉士晉洗馬尋除侍講充 國史館總纂二十一年
敎習庶吉士與修明鑑明年坐承纂官累左遷編修充 國史館
提調二十五年分校禮部試道光元年直 上書房

召對 褒勉有加 賜賚不勝紀二年復校禮部試遷贊善以汪
太宜人病乞養歸至則太宜人已考終矣明年主講鍾山書院尋
宅趙太宜人憂服闋輦下故人爭走書勸出山公曰祿不逮養卽
萬鍾何加焉況家窶未莫乎前後主鍾山暨正誼紫陽書院二十
有五年遂不復出公以詞壇耆宿主持風會後進瞻之若山斗在
吳中結問梅詩社與石琢堂吳棣華兩廉訪韓桂船尙書彭輩同
郡守董琴涵兵備諸公迭主敦槃當是時巡撫陶文毅承宣使梁

苣鄰皆同年生也。竇應朱文定華陽卓文端並厲吳中公與諸公及顧南雅吳棣華相倡和續滄浪七友圖文采風流照難一世。門下高材生多出取巍科。王辰會狀馬比部學易吳宗伯鍾駿並出公門而族弟榮實復領庚子解額洎丁未公重謁泮宮第三孫維垣適注學籍相攜扶以入公有詩紀事一時傳和爲佳話焉。明年以老辭講席三十年考終里第壽八十有二。公性孝友內行純竺用文學實身歷清要樸直。

三天疊司文柄所至皆得士若許文恪乃普文文端慶季尙書芝昌馬撫部秀儒其最也尤畱心文獻爲文原本經術教士以通經學古爲先與桐城姚姬傳陽湖李申耆並負儒林宿望蓋鼎足而

三云所著曰小萬卷齋文二十四卷詩三十二卷續藁十二卷經進藁二卷輯 國朝古文彙鈔初集百七十二卷二集百卷 國朝詁經文鈔六十二卷文選集釋二十四卷經文廣異十二卷說文假借義證二十八卷子五夢元國子生鼎元壬辰舉人蔚元增廣生起元甲午優貢葆元從九品孫十二人曾孫七人

贊曰一代之興必有鴻達魁壘之儒爲斯文所繫若姚氏鉉之唐文粹呂氏祖謙之宋文鑑蘇氏天爵之元文類黃氏宗羲之明文海皆一朝文獻所薈也

聖清文治邇前古說經家尤鏗鏗顧未有甄綜爲巨編者夫非操鑑者難其選歟公所輯 國朝文彙鈔暨詁經文鈔煌煌乎經國

之巨業也諸作者且藉公以傳公之傳庸有既邪余夙景慕公公
之曾孫憲屏司憲客吾鄉屬爲公傳烏序異時傳儒林者抑將有
取於斯也歟